



*Creation du Ciel & de la Terre, des Arbres, & Herbes, des Astres,  
& de tous animaux.*

**A**V temps que l'Eternel auoit ordonné de manifester sa gloire , il crea au commencement le Ciel & la Terre qui estoit sans forme , & vuide , & les tenebres estoient sur la face de l'abysme. Et Dieu dit , Que lumiere soit faite , & separa la lumiere des tenebres , & appella la lumiere Iour , & les tenebres Nuict . Lors fut fait du soir & du matin le premier iour. Puis Dieu dit , Qu'il soit fait vn Firmament entre les eaux , & separa les eaux du Firmament , & Dieu appella le Firmament Ciel. Puis dit , Que les eaux soient assemblées en vn lieu , & que le sec apparoisse , & Dieu appella le sec terre , l'assemblée des eaux mer ; & Dieu dit , Que la terre produise herbe verdoyante , Arbres fructiers produisans fructs selon leur espece. Apres ce , Dieu dit : Que luminaires soient faits pour separer la nuit du iour , & pour signe des ans , iours & saisons. Dieu fit deux grands luminaires au Ciel , le grand pour le iour , & le moindre pour la nuit , & les Estoilles. Apres Dieu dit : Que les eaux produisent reptiles ayans ame viuante , & volatilles sur la Terre , & sous le Firmament. Dieu donc crea tous animaux , terrestres , celestes , & aquatiques , & les benist , disant : Croissez & multipliez sur la terre.